

Date – 17/07/2025

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Archaeological Survey of India chuan Champhai district-a Lianpui khuaa Lungphun ropui chu hmun pawimawh bik National Importance ah a puang.
2. Lunglei khawpui chuan ram pum huap khawpui fai lawmman, Swachh Survekshan State Award vawiin khan a dawng.
3. Ramchhhunga khawpui fai berah Indore khawpui thlan a ni.
4. Bihar sawrkar chuan thlaleh ni khat atangin mipuite hnenah kawlphehta unit 125 thleng a thlawnin hman a phalsak dawn

<><><>

LUNGPHUN ROPUI

Sorkar laipui Ministry of Culture (Archaeological Survey of India) chuan Champhai district-a Lianpui khuaa Lungphun ropui chu hmun pawimawh bik National Importance ah a puang.

Kan corr report lo ngaithla ang.

VC

Archaeological Survey of India chuan Lianpui khua a pi pu sulhnu "Lungphun Ropui" chu nimin khan India rama hmun pawimawh atan a puang a. Gazette of India ah tarlan a ni. Lianpui khua a Pi Pu Sulhnu India rama hmun pawimawh a puan a nih theihna tur hian tun thla ni 6 khan Archaeological Survey of India Director Subramanyam an a hmunah a tlawh a ni.

Lianpui khua a Lungphun Ropui hi Archaeological Survey of India chuan kum 2021 khan National importance a puan a nih theihna turin Preliminary notification a lo ti chhuak tawh bawh a ni.

Lungphun Ropui India rama hmun pawimawha puan a ni ta hi Lianpui khawtlang chuan lawmawm an tih thu an sawi a, theih tawp chhuaha hmalak puitu tu Art & Culture Minister Pu C.Lalsawivunga leh Rajya Sabha MP Pu K.Vanlalvena te chungah lawmthu an sawi a ni.



CHURACHANDPUR RICE SUPPLY VIA MIZORAM ENDED

Manipur tualchhung buaina avanga Churachandpur leh a chhehvel mamawh Food Corporation of India (FCI) Aizawl Divisional Office in buhfai a thawn thin chu kumin April thla khan tihtawp a ni.

Akashvani Aizawlin FCI hotute a kawmnaah he thu hi an sawi a. FCI hotute chuan Manipur buai avanga buhfai thawn thin chu kumin April thla thleng khan kalpui a nih thu leh May thla atang khan tih tawp a ni an ti a. Churachandpur leh a chhehvel te hman tur Mizoram kaltlanga buhfai pek chu kum 2023 June thla atang khan kalpui niin an kalpui tawp hun, kumin April thla thleng khan quintal nuai 3 sing 2 sang 2 chuang hret an thawn hman a. Tunah chuan a kawng ngai, a hmaa an kalpuina kawng, Jiribam, Assam atangin Imphal kaltlangin phurh a ni leh tawh a ni.

FCI hotute chuan Kawnpui leh Sairang inkar kawng chhia avangin khaihlak tlem azawng chu awm mahse an kudama buhfai phurh kawngah harsatna liantham an tawh rih loh thu an sawi a. Engpawh thleng se an kalphungah thla 3 daih buhfai an kudama dah reng chu an kalpui mek thu an sawi a. Tun dinhmunah pheih chuan thla 4 emaw thla 5 daih buhfai a awm rih thu an sawi a ni.

Voicecast

Manipur tualchhung buai hnua tanpuina tur buhfai kum 2023 June thla atanga thawn thin chu kumin April thla khan tih tawp a ni a, thuneitute chuan Mizoram kaltlanga buhfai an thawn tak loh chhan chu Manipur-a President's Rule kalpui avanga boruak a ziaawm chhoh vanga nia an hriat thu an sawi a. Hetihruah hian engpawh thleng thei a nih avangin Mizoram kaltlanga pek pawh eng chen nge a tawp dawn tih an hriat loh thu an sawi a ni.



SAITUAL

Saituala District Education Officer chu thlaktu awmlova sawn tum a ni tih sawiin, an duhloh zia lantir nan Saitual MZP Hqrs Sleh All NGO Saitual hmalaknain DEO leh a staff te Pisa kai tur vawiin khan an dang.

DEO pisa kai tur dannaah kalkhawmte hian resolution siamin, District Education Officer sawnchhuah sak chungchangah MZP Headquarters Saitual ten hma lain, Education Minister leh bialtu MLA te hnena DEO sawnchhuak lo tura an ngenna chuan awmzia a nei lova hei vang hian DEO leh a hnathawk zawng zawngte chu Saitual District VC Association leh All NGO te chuan tiam chin awm lova an Pisa kai tur dan nise an ti tih an sawi a ni.

Saitual DEO chu a thlaktu tur awm lova sawnchhuah an remti lova, a thlaktu tur DEO ngei sorkarin a pek hma loh chuan sawnchhuah sak lo tur leh Transfer order chusut sak turin sorkar an ngen tih an resolutionah chuan an tarlang bawh a ni.



CONGRESS PRESS CONFERENCE

Mizoram Pradesh Congress Committee thupuangtu Dr Lallianchhunga'n ZPM sorkar chu restricted tender uar taka kalpuiah a puh.

Vawiina MPCC Media department ten a hoa Aizawl Press Club-a chanchinbumite a kawmnaah MPCC Spokesperson Dr Lallianchhunga chuan ZPM Leader Pu Lalduhoma chuan MNF sorkar laia restricted tender inpek dan a sawisel thin a ti a, MNF sorkar hnuaia sum leh pai harsatna nen sawi zawmin Restricted Tender ringawt pawh an tih ve loh chuan Mizoram sum dinhmun nasa takin a siam tha nghal ringawt dawn tiin a sawi thin a. Hetiang khawpa an sawisel hi tuna an sorkar hnuaia ZPM chuan uar leh nasa zawkin an kalpui ta a ni a ti.

Dr. Lallianchhunga chuan Sorkar document-a an hmuh theih aṭanga a lan danin ZPM sorkar chuan kumin April 17 khan SASCI 2024-25 hnuaia hna cheng vbch 629 leh nuai 17 man chu Restricted Tender hmangin an duhsak zawng te an thawh tir theihna turin Department te chu blanket approval a pe tih a sawi a. Hei hi Eptu party an nih laia an thusawi nen a inkalh chiang hle tih sawiin RTI chhanna aṭanga a lan danin ZPM sorkar pian aṭanga kumin April Ni 29 thleng khan Restricted Tender hmangin hna lian tak tak 47, cheng vbch 316 leh nuai 38 chuang man a pe chhuak tawh a ti.

Kum 2023 Assembly Inthlanpuia ZPM Manifesto ah "Contract hnate a tam thei ang ber Open Tender-a koh thin a ni ang" tih a awm thu sawiin Dr Lallianchhunga chuan an Party Manifesto ngei pawh palzuta sorkarin Restricted Tender a kalpui dan chuan sorkar belhchiandawl leh rintlak tak a nih loh zia a tilang chiang hle a ni a ti bawk.

<><><>

LAWNGTLAI CRIME REVIEW MEETING

Lawngtlai-a pawikhawihna thleng hrang hrang thlirnohna, Crime Review meeting chu vawiin khan SP Conference Hallah SP Pu PC Lalchunglura hova neih a ni.

Lawngtlai SP Pu PC Lalchunglura chuan Lawngtlai District Police te chu theihtawp chhuah tura fuihin, thubuai chhui leh thilsual titu man leh midang tanpuina ah te Police chu mipuiin an thlamuanpuina chu chhawmnun zel a tul thu a sawi.

Kumin January atanga nimin thleng khan Lawngtlai Police ten thubuai 38 an ziaklut tawh a, heng zinga 9 chu inbumna lam hawi niin, Rukruk thubuai 8 a awm bawk. Nikum 2024 January atanga July thla chhung khan thubuai 44 ziahluh niin, kumina thubuai ziahluh hi nikum aain 13.63% in a tlahniam a ni.

Nikum 2024 January atanga December chhung khan thubuai 87 ziahluh niin, rukruk thubuai a tamber a, thubuai 87 ah hian 16 chu Court in a ngaihtuah lai a awm mek.

Crime Review Meeting leh infuih tharna ah hian SP, Additional SP, SDPO te, OCTe leh Case Investigation Officer te an tel a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



SWACHH SURVEKSHAN AWARD

Lunglei khawpui chuan ram pum huap khawpui fai lawmman, Swachh Survekshan State Award vawiin khan a dawng.

Ministry of Housing and Urban Affairs (MoHUA) buatsaih India ram puma khawpui fai inelna, Swachh Survekshan Award 2024-2025 chu vawiin khan New Delhi-a Vigyan Bhawan-ah sem niin, Lunglei chuan State Award pakhat, Mizoram khawpui zinga faina kawnga hma hun eng ber lawmman, 'Promising Swachh Shehar Award' a dawng a. Lawmman hi Mizoram sawrkara Urban Development & Poverty Alleviation (UD&PA) Minister Pu K. Sapdanga hovin, Lunglei Municipal Council (LMC)-a Vice Chairman Pu K. Lalrinawma leh official te'n Union Minister of Housing & Urban Affairs Pu Manohar Lal kut atangin an dawng a ni.

Swachh Survekshan Award hi Swachh Bharat Mission-Urban (SBM-U) hnuaia inelna niin, he inelnaah hian India rama khawpui zawng zawngte chu tehfung hrang hrang hmangin an inel a. Tun tum hi Swachh Survekshan Award vawi 9-na niin, khawpui len dan azirin inelna huang hrang hrang siam a ni a. Tun tumah hian award chi hrang 78 sem chhuah a ni a.

Kum 2016-a Swachh Survekshan Award bul tan a nih atangin Lunglei khawpui chuan award 6 a dawng tawh a ni.



SWACHH SURVEKSANP

Ramchhhunga khawpui fai berah Indore khawpui thlan a ni. Kum riat chhung a zawnin Indore hian khawpui fai ber lawmman hi a dawng tawh a. Kuminah hian Surat chu khawpui fai pahnihna niin Navi Mumbai chu pathumna a ni. Sawrkar laipua khawpui fai dan endikna Swachh Survekshan 2024-25Award chu vawiin khan President Droupadi Murmui chuan New Delhiah a sem a. Thusawiin Pi Murmu-i Viksit Bharat 2047 atan faina chu a pawimawh hle tih sawiin ramchhung mipuite chu faina, hriselna leh changkanna lam pan zel turin a sawm a ni.



BIHAR

Bihar sawrkar chuan thlaleh ni khat atangin mipuite hnenah kawlphehta unit 125 thleng a thlawnin hman a phalsak dawn. State Chief minister Nitish Kumar-a chuan he hmalakna hian chhung

vaibelchhe 1 leh nuai 67 te tan hlawkna a pe dawn a ti a. Kum thum lo
awm tur chhungin ni tha hmanga kawlphetha siamna chenna in tinah dah
vek tum a nih thu a sawi a. Bihar sawrkar chuan a senso zawng zawng
tum a inhuam thu a sawi bawk a ni.

<><><>